

In tango ed in viva silla veta

Il Chor d'affons dalla vischnaunca Sumvitg seprepara actualmein sil concert da primavera. Igl ei in project special che ha entschiet gl'ust digl onn vargau. Era in chor mischedau da carschi ei seformaus. Denton buc el «format» ordinari cun mappas e statica.

AUGUSTIN BEELI/FMR

Sonda vargada ei la sala da cultura a Trun s'emplenida cun massa glieud. En tut ein round 110 carschi ed affons s'entupai l'emprema gada per in'empresa communabla. Ils affons ha giu grond tschaffen d'exercitar da cuminanza culs carschi. La dirigenta Flavia Walder e la vicedirigenta Marina Bearth dil

Chor d'affons han menau l'empresa dil project «Dolce vita». Igl ei in grond project – ed in special. «Mintga affon che conta el chor ha astgau eleger ina persuna carschida che accumpagna e collaborescha cun nus. Igl ei propi ina coola caussa, jeu hai tschaffenun», ha *Flavia Walder* manegiau sonda el discours culla FMR.

Pliras generaziuns semovan

Naven dil tat, il padrin, tatta, madretscha, mumma ni bab, seigi in chor da carschi seformaus. Il pli vegl ha 72 onns, il pli giuven 20 onns. Cun quellas bunas premissas seigi ei stau pusseivel da realisar l'idea d'in concert, ha *Flavia Walder* explicaui. Sonda allas nov ha l'empresa concentrada cun omisdus chors entschiet. Era ils musicists *Martin Heisch* al clavazin e *Casper Montalta* alla ghitarra ein stai presents.

Il tetel dil project ei «Dolce vita», guder la veta ed emblidar empau ils quitaus. Naven digl uost tochen la fin digl onn han las dirigentas priu a mauns las empremas canzuns dil project. Cun tocs da Patent Ochsner, in «Tango turistico» sco era hits en divers lun-gatgs han ils affons neginas difficultads. Els emprendan spert ordadora. Cantar senza mappa e senza fegl, culs mauns libers per

moviment, fa bia pli grond plascher ed ei in ver gudiment.

Il november ha il chor interrutt ils exercezis da quei project. Els han astgau render honur al nievelegiu president dil cussegli nazional e cantau avon l'assemblea federala. Lu han els cantau puspei ils 3 da december a Rabiüs pil beinvegni a casa da *Martin Candinas*. Suenter Daniev ha Flavia Walder cuntuau

ils exercezis per «Dolce vita» ed entschiet las emprovas culs carschi e canzuns en quater vuschs. Finamira fussi ch'ils carschi cantassan era ordadora. Pertgei il concert cun bia temperament includa coreografia e moviments. Sonda e dumengia, igl 1. ed ils 2 d'avrel 2023, vegnan tuts ad esser semtgai per la produzion singulara ella halla plurivalenta a Trun.



Sonda ei stada l'emprema empresa communabla dil project.

FOTO AUGUSTIN BEELI